

In memoriam Nidia Ecury

2 di februari 1926 – 2 di maart 2012

Ken cu ta mi Dushi

Tur atardi nos tabatin un pustamento di careda.

Esta, mi rumannan cu mi.

No tabatin ningun premio material conecta cu e pustamento.

Sinembargo, e tabata un evento sumamente interesante di mi añanan di mucha.

Mi ta corda calidat di e atardinan ainda. Tin di nan cu tabata colo geel, tin cu tabata ros, segun posicion di solo y segun tempo di aña..

Tin cu tabata fresco dushi, otro nan tabata calor y nan tabata primi contra bo frenta.

Tabatin atardinan sigui cu su archinan tabata bula pasa te abou na haltura di nos enkel, cu un rapidez cu tabata lanta envidia den nos, casi casi.

Dilanti di nos cas tin un tereno grandi, bashi.

Atardi tabatin masha wega ta tuma luga eynan:

Pele, polis cu ladron, bulamento di cabuya.

Pero tur e weganan ey tabata pa pone tempo bula, pasobra e pustamento di careda tabata lo principal di tur atardi.

Di con?

Wel, pasobra asina mi tata, biniendo di pacus, dobla e skina dilanti di nos cas, e tabata sacudi su boshi di yabi y cuminsa canta: "Ken cu ta mi dushi, core bin brasami".

Nos tur tabata laga wega inmediatamente, basha careda pa nos yega cerca Papa, manera tanto flecha cu a sali foi boog. Nos tur tabata anhele e prome brasa, e prome sunchi.

Nos tabata 13 ruman y ami tabata di nueve yiu.

Mi mala suerte tabata cu e di dos mita, mi tabata cay net mey mey. Prome cu mi, tabatin dos ruman homber cu tabata core manera bina. Nunca di mi bida lo mi no por a ni sikiera soña di gana nan. De bes en cuando, for di un

sentimento di ternura, nos tur tabata baha velocidad, duna un di e rumannan mas chikito chens di gana. Pero ami, den mi puesto poco faborabel, ni holo di chens. Mirando p'atras, mi tata lo tabata anhele mes tanto cu nos, e momento di sacudi su yabinan y canta su cantica. Lo mester tabata un placer grandi p'e di sa cu nos tabata djis warda zonido di e yabinan pa ranca careda y expresa nos cariño di mucha, cariño inocente, cariño puro.

Pero keto bay mi pobercito mester a contentami cu di tres of cuater brasa y sunchi. Ay, mara un dia mi por tabata esun di prome pa brasa e hende cu mas mi stima. Esaki tabata anhele di mi curason di mucha.

Bueno.

Ora cu no tin pan, ta come casaba.

Un anochi mi a inventa mi mes casaba.

Mi tata tabata sinta ta combersa cu mi wela. Riba un dje stoel nan recht di pone canto di muraya. Asina cu a bini un buraco den combersacion di mi tata cu su mama, mi a dal aden y mi a puntra:

"Papa ke nos hunga ken cu ta mi dushi?"

Mi a sigura mi mes di antemano cu e dos ruman hombernan mas grandi no tabata den cercania mes.

Ta esnan mas chikito cu mi so tabat'ey.

Mi tata no tabatin nada contra. Lo el a interpreta mi pidimento como un deseo di expresa cariño nada mas. Pero tabata esey combina cu ambicion, ambicion di gana maske ta un biaha.

Nos tur a para na un liña imaginario y mi tata a canta su conocido cancion:

"Ken cu ta mi dushi, core bin brasami".

Nos a saca careda y porfin victoria tabata di mi.

Di prome! Di prome! Pero...mi



victoria tabata amargo, pasobra mi a core bin cu tanto vert, cu mi tata su cabes a dal bugudum! Den e muraya su tras.

Awa a yena mi wowo y m'a desea pa tera habri gulimi, mientras mi tata, medio hari, medio frenta cera, tabata pasa man p'atras di su cabes.

Mi no por lubida e pustamento aki, ni e zonido di e yabinan, ni e cantica.

Wel, mi tata por drumi trankil dje, pasobra mi ta sigui corda. Y tanten cu mi sigui corda, e no a bay completamente.

Ora mi yiu muhe lesa un buki of mira un pelicula poco espantoso, e ta hiba potret di mi tata den su camber pa Opa compa'ne anochi.

Y siman pasa mi yiu homber di casi 19 aña di cu mi:

"Mi tin gana di por combersa cu Dundun, bo tata. Jammer cu e guy no t'ey pa nos a "chat" poco cu otro".

Boso ta compronde kico mi ke men?

Ken cu ta bo dushi, si bo sigui cord'e, si bo sigui stim'e, e no ta muri completamente.

Ya.

T'esey mi kier a bisa

Bon?

Skirbi pa Nidia Ecury na 1980

Saca for di "Cosecha Arubiano"